

儀

顧

堂

續

跋

儀願堂續跋卷十二

歸安陸心源伯剛甫著

南宋書棚本江文通集跋

梁江文通集十卷首有總目每葉二十行每行十八字案隋書經籍志江淹集九卷後集十卷註曰梁二十卷新舊唐書皆云前集十卷後集十卷崇文總目郡齋讀書志直齋書錄解題文獻通考皆云十卷與今本同晁氏曰文通著述百餘篇自撰爲前後集今集二百四十九篇今此本二百六十九篇四字恐六字之譌當卽晁氏所見之本

宋諱如殷博士殷東陽之殷許徵君陶徵君王徵君之徵構象臺之構鏡論語之鏡宮朝禮哀敬之敬粉邑向嚴玄之玄咸告忠貞之貞皆爲字不成行款字數匡格大小又與臨安睦親坊陳宅本孟東野集浣花集同當亦宋季臨安書鋪所刊爲北宋以來相傳舊本其題梁江文通者必所刊晉唐六朝人集尙多非一集故耳較汪士賢本多知已賦一首較張溥本多蕭讓大傅揚州牧表一首此外字句之間勝汪張兩本處甚多

七閣箸錄未見此本可見流傳之少矣余又有梅鼎

祚刊本名江光祿集亦分十卷編次前後缺文墨釘
皆與此本同增遂古篇詠美人春遊征怨三首爲補
遺不羸入十卷之內亦善本也此本每冊有太倉王
氏藏書朱文長印弁州山人舊藏也

張青芝手鈔陶隱居集跋

貞白先生陶隱居集題昭臺弟子傅霄編集大洞弟子陳桷校勘鏤板前有隱居傳後有梁元帝昭明太子邵陵王綸陶隱居碑司馬子微碑陰記蘇庠像贊又集外兩文隱居集久亡王欽臣始哀遺文三十二篇南豐曾恂益以寒夜愁胡笳二詩難均聖論傅霄爲之編次附殘文于後紹興中有刊本嘉靖甲辰文休承錄于崑山周氏崇禎戊辰葉林宗夾從文本傳錄此則乾隆元年張青芝位借葉本所手錄者四庫未收阮文達始進呈此本比阮本較爲完善

元槧李太白詩註跋

分類補註李太白詩二十五卷次行題春陵揚齊賢
子見集註章貢蕭士贊粹可補註前李陽冰樂史序
劉全白碣記宋敏求曾鞏毛漸序次關中薛仲邕編
年譜次目錄每葉二十四行每行二十字小字雙行
每二十六字目後有建安余氏勤有堂刊篆文木記
元刊元印本其分賦古風樂府歌吟贈別送酬答遊
宴登覽行役閒適懷思感遇寫懷詠物題詠雜詠閨
情哀傷二十類與晏知止本同惟晏本賦列二十五
此列卷一餘亦少有參差宋次道有云沿舊目而釐

正其彙次使各相從南豐亦云次道以類廣白詩今
諸本皆分二十類則分類實始于次道非楊蕭兩家
所爲也兩家所註有詩無文明郭雲鵬刊本增雜文
爲三十卷註則刪削過半有全章削去者有一章削
去四五百言而留一二句者又增以禎卿曰云云使
古書面目幾無一存殊爲謬妄曾鞏序云李白集三
十二卷舊歌詩七百七十六篇今千有一篇雜箸六
十五篇晏本作李白集三十卷餘同咸洎本作李白
詩集二十卷七百若干篇今九百若干篇與元豐類
藁同與此本及晏本不合

咸淳本李翰林集跋

李翰林集三十卷次行題翰林供奉李白前有李陽冰樂史魏灝曾鞏序李華撰墓志劉全白撰碣記范傳正裴敬撰墓碑後補司空山瀑布五古一首有紹熙元年七月趙汝愚題後有咸淳己巳刻版戴覺民跋每卷有目連屬篇目每葉二十行每行二十字晏知止本歌吟在第六七兩卷此本在第十七卷餘亦前後參差曾鞏序首數句與元豐類稿合與晏殊本元刊補註本不同或此出曾南豐本而彼出宋次道本歟

元槧黃鶴註杜詩跋

集千家註分類杜工部詩二十五卷次行題東萊徐
居仁編次三行臨川黃鶴補註首爲杜工部傳序碑
銘次杜工部年譜題臨川黃鶴撰次集註杜工部詩
姓氏次目錄卷二十五後有至正戊子潘屏山刊于
圭山書院一行每葉二十四行每行二十字小字雙
行每行二十六字居仁仕履未詳杜詩分門編類始
于居仁故首題居仁名見姓氏建安蔡氏夢弼亦在
姓氏中集註曾採及惟郭知遠註不及一字耳

宋槧九家注杜詩殘本跋

新刊校定集註杜詩存卷六至十一凡六卷每卷後有寶慶乙酉廣東漕司鋟板一行卷七卷八後又有朝議大夫廣南東路轉運判官曾噩承議郎前通判韶州軍州事劉鎔潮州州學賓辛安中進士陳大信同校勘四行每葉九行每行大字十六小字雙行版心有字數及刊工姓名白宋一厘賦所謂九家註杜寶慶漕鋟自有連城蝕甚勿嫌者祇存五十五葉此本尙存六卷可以壓倒百宋矣所採王洙宋祁王安石黃庭堅薛夢符杜田鮑彪師尹趙彥材九家之註

而趙註尤多醜字子肅福建閩縣人紹熙四年進士
尉上高轉監行在惠民局嘉定戊辰上書言積弊未
易革人心未易服公道未易行下言未易通皆切中
時弊改知晉江縣嘉定乙亥用從臣薦通判建寧府
入監左藏東庫是歲夏旱應詔言六事在職二年除
軍器監遷大府寺丞辛巳遷大理正出知潮州治最
推廣東運判寶慶二年卒七歲能屬文至老未嘗一
日廢書箸有義溪集十卷班史錄二十卷見陳宓復
齋集運判曾公墓誌萬姓統謙以爲字醜甫固誤書
錄解題以爲閩清人亦誤

元槧陸宣公集跋

唐陸宣公集二十二卷前有權德輿翰苑集序次蘇軾等進奏議劄子次至大辛亥厲一鸚序卷一至十制誥卷十一至十六奏草卷十七至二十二中書奏議目錄後有記云至大辛亥秋教官厲心齋奉總管王公子中命重新繙梓詳加校訂任其責者學正四明陳沆學錄毗陵蔣鵬孫路掾廬陵易偉也監督直學張天祐馬天祺學吏程泰孫施去非七行案是集宋時嘉興學有版歲久漫漶至大辛亥盱眙王子中來守以推官胡德修家藏善本重刊此其初印本也

每葉二十行每行十七字一至卷十版心刊苑幾十
一至廿二版心刻奏幾皆有字數刊工姓名卷中有
朱文石氏朱文方印華亭朱氏白文方印忠宣第三
十七世孫朱文方印香圃所藏白文方印三間草堂朱
文方印張載華印朱文方印佩兼朱文方印芷齋圖
籍朱文方印蘇東坡等所進劄子題曰本朝名臣此
從宋本翻雕之証也

宋槧宋印韓昌黎集跋

昌黎先生集十卷前有李漢序每葉二十二行每行二十字版心有字數及刻工姓名每卷末葉版心有此卷若干版計若干字卽百宋一厘賦之小字本所謂字畫方勁尙未有註北宋槧本者也今考粗敘所經觀之觀或密若昏媾之媾央央叛還遺之遺或弛而不穀之穀或復斷若姤之姤結構麗匪過之構投棄急哺穀之穀雷電怯呼詬之詬月明御溝曉之溝凡高宗御諱嫌名皆爲字不成他如融液煦柔茂之煦殷其如阜之殷窗前兩好樹之樹曙光青映映之

曙恩澤完穢狻之完厥大誰與讓之讓懸樹垂百尺
之懸耿耿水蒼佩之耿方愬不懲創之懲祖軒而父
頃之頃大勾幹玄造之玄皆缺避甚謹惟慎字不缺
當爲紹興中刊非北宋本也蕘圃誤矣每冊有張敦
仁讀過朱文長印陽城張氏省訓堂經籍記朱文長
印古餘珍藏子孫保之朱文長印枚菴流覽所及朱
文方印

米麻沙槧柳集跋

增廣註釋音辨唐柳先生集四十三卷年譜一卷別
集二卷外集二卷附錄一卷次行題南城先生童宗
說註釋三行新安先生張敦頤音辨四行雲間先生
潘緯音義前有劉禹錫序乾道三年吳郡陸之淵序
行款格式與韓文考異同當爲一家所刻亦宋季麻
沙坊本也有花笑廬藏朱文長印劉松所藏朱文長
印瞋琴山館珍藏朱文方印述古堂圖書記朱文長
印劉松號疏雨烏程縣南潯鎮人其藏書之所曰瞋
琴山館

宋麻沙槧韓文考異跋

朱文公校昌黎先生文集四十卷外集一卷集傳一卷遺文一卷次行題晦菴先生考異留耕王先生音釋前有朱子序次寶慶三年王伯大序次凡例次目錄每葉二十六行每行二十三字小字雙行凡各本異同各家註釋皆以黑質白章別之凡例後有云本宅所刊係將南劍州官本爲據併將音釋附正集焉乃宋末麻沙坊賈識語明覆本譌奪甚多此本字畫圓整譌字亦少宋季麻沙善本也卷中有周良金印朱文方印毘陵周氏九松迂叟藏書記朱文長印

舊抄沈亞賢集跋

沈亞賢文集十卷前有元祐丙寅無名氏刊版序次
總目每卷有目後有葉石君手書跋每葉十八行每
行二十字當從元祐刊本鈔出者是書宋以後無刊
本鈔帙流傳脫譌甚多此本譌較少如卷首夢遊仙
賦星越曉以淡白淡不譌談襲列烈蕙之芳風蕙不譌
董羸吹既調曼湘絃羸不譌羸菱結帶兮荇含絲不
奪兮字皆勝諸本至秦夢記湘中怨解列卷第二異
夢錄列卷第四則北宋已然矣

影宋孟東野集跋

孟東野詩集十卷題山南西道節度參謀試大理評事平昌孟郊後有宋敏求題題後有臨安府棚前北睦親坊南陳宅經籍鋪印一行前有目錄每葉二十行每行十八字版心有字數汲古閣影宋精抄本前有宋本甲毛晉私印子晉汲古主人毛扆之印斧季七印後有虞山毛晉子晉書印汲古得修緘三印與明翻景定園材本互勘大略多同惟結銜平昌二字改爲武康二字此本目錄微有減字耳

新刻李衛公集跋

右李衛公集三十四卷江蘇新刻本後附補遺一卷不知何人所輯首載新授太子太師杜衍制制詞有云往以時事來還宰旅及深惟元老等語則其人必宰相也查唐世宰相杜姓十一人曰如晦曰淹曰元穎曰審權曰讓能曰黃裳曰佑曰悰曰正倫曰鴻漸曰暹無名衍者惟宋宰相杜衍曾爲太子太師李燾資治通鑑長編有云皇祐五年八月壬子太子太傅致仕杜衍爲太子太師以二府舊臣特遷之是則此文乃宋杜衍遷官制也安得出衛公手是刻所據乃

黃蕤圃家影寫宋本勝于明萬厯嘉靖諸刻補遺之
刻未免畫蛇添足耳

宋槧浣花集跋

浣花集十卷題曰杜陵韋莊前有癸亥年六月九日
莊弟韋藹序宋諱有缺有不缺每葉二十行每行十
八字與臨安睦親坊陳宅本孟東野集行款匡格皆
同當亦南宋書棚本也宋刊存卷四至十前三卷黃
蕘圃以影宋本抄補每卷有葉陽生白文方印後有
陽生跋每冊有士禮居朱文方印前後有蕘圃三跋
陸損之跋陽生蘇州人天士之父與汪鈍翁酬唱工
詩能醫

高麗刊桂苑筆耕跋

桂苑筆耕二十卷題都統巡官侍御史內供奉崔致遠撰前有大匡輔國崇祿大夫議政府左議政豐山洪奭周序及達城徐有樂序次中和六年致遠表進序每卷有目連屬篇目高麗活字仿宋本唐書藝文志箸于錄阮文達亦未進呈案致遠字海夫號孤雲高麗妖溝人年十二從商舶入唐十八舉進士調溧水尉高駢帥淮南辟爲都統巡官凡文告皆出其手後東歸仕高麗爲翰林學士兵部侍郎以終道光中廣東潘仕成有刊本脫譌甚多不如此本之善

宋嘉定永州藁范忠宣集跋

范忠宣公文集二十卷前有樓鑰序後有嘉定辛未范之柔跋壬申沈圻廖視陳宗道跋每葉二十四行每行二十字是集南宋以前未經板行嘉定壬申吳興沈圻知永州始从公之元姪孫之柔得家藏本命教授陳宗道校正刻于永州語涉宋帝皆提行卷二十行狀內章惇惇字皆註光廟諱宋嘉定中永州刊本也若因字體不工疑非宋刊不知永州地居偏僻刊工不精無足怪者有季振宜藏書朱文長印滄葦朱文方印季振宜印朱文方印

宋麻沙本陳簡齋詩註跋

須溪先生評點簡齋詩集註十五卷前有劉辰翁序
卷一賦卷二至十三詩卷十四雜著卷十五無住詞
年譜散入詩題之下續添正誤散入每卷之後與張
月霄所著錄阮文達所進呈之三十卷本分卷不同
編次亦異或卽辰翁所合併歎註爲胡穉作又有增
註以黑質白章別之不知出自何人今不可攷有汲
古閣稽瑞樓方氏若衡曾觀貽典姚婉貞芙初女史
諸印目錄後有文文肅題字卷六後有張丑題字蓋
經毛子晉陸敕先陳子準方芙初諸家收藏者

宋淳祐建州槧朱文公集跋

晦菴先生朱文公文集一百卷目錄續集十一卷別集十卷前有朱子小像及慶元庚申自題後有成化黃仲昭補刊跋續集前有淳祐五年王遂序淳祐庚戌徐幾跋別集前有咸淳元年黃鏞序每葉二十行每行十八字版心有字數及刻工姓名朱子集爲朱在所編王潛齋所刊續集爲王實齋遂以蔡覺軒劉文昌兩家所抄撥付劉叔忠所編卷九以下徐幾從浦城尉劉觀光得與劉韜仲札數十通增爲十一卷別集爲建交通守余師魯所編咸淳元年建安書院

山長黃鏞序而刊之是集宋時有浙閩兩本浙本明
洪武初取版置南雍不知編自何人此乃閩本明初
版存福建藩解成化中黃仲昭以浙本勘訂補刻劾
奏唐仲友數狀又修補缺數百葉此則成化後印本
也凡明補之葉匡格較高字形較小一望可知約不
過宋刊百分之一二耳卷中有敬業軒白文方印張
履祥印白文方印曾爲桐鄉張楊園先生所選讀每
有朱文選字印其圈點亦楊園筆也

金陵雜詠跋

金陵雜詠十九首題曰左朝請郎天章閣待制知江
寧軍府事武陽黃履江寧府溧水縣尉周沔書案履
字安中邵武人宋史有傳沔字會宗蘇州人元祐三
年進士其刻石本在江寧府治元時刻夫子像於碑
陰因移江寧縣大成殿陰轉向外而正面倚壁世遂
罕有知之者厲樊榭輯宋詩紀事亦未得見僅錄安
中詩一首嘉慶中江寧嚴觀始訪得之刻以行世亂
後刻本極少余所藏乃从嚴刻傳錄者邵武徐小勿
明府留心鄉先輩著述遺書譚芷佩明府請借錄副

將付梓人因命小胥錄一本貽之邵武鄉先生箸述
余家所藏尙有黃公紹在軒集世間亦罕流傳明府
倘能合梓行世亦古人之知己也

舊抄建康集跋

建康△八卷舊抄本每頁十六行每行二十字廓字
注御名桓字注欽宗廟諱惇字注光宗廟諱蓋從寧
宗時刊本影寫者未有二十代孫萬又名樹蓮跋案
樹蓮字林宗明諸生國亡棄去改名萬世居洞庭山
嘗游虞山樂其山水因家焉所至必多聚書會鼎革
獨身走還洞庭已復居虞山購書倍多於前每遇宋
元抄本收藏古帙雖零缺單卷必重購之世所常有
者勿貴也得書分別部居精辨眞贗手識其所由來
見徐乾學澹園△葉林宗傳此本蓋從毛子晉借錄

子晉則得之金陵焦弱侯後人者中間朱筆校補數
十字皆林宗筆也卷三書李弼告後書唐李氏告後
蘇秦論范增論養生論上中下七篇仍缺當求葉調
生藏本補全之

宋槧友林乙稿跋

友林乙稿一卷題曰四明史彌寧後有名域者跋不
著其姓每葉十六行每行十六字版心有字數及刻
工姓名百宋一厘賦所謂流麗娟秀兼饒古雅之趣
在宋槧中別有風神者也序稱乾道癸巳文惠帥閩
域以庠序諸生蒙眊昧則域蓋閩人乾道癸巳下距
嘉定六年癸酉四十年序稱後四十年乃得親炙春
坊領閣公之幕下與郡齋讀書志所云彌寧以國子
生蒞春坊事帶閣門宣贊舍人嘉定中知邵陽合則
彌寧之知邵陽在嘉定六年集中有丁丑歲中秋日

勸農城南詩系在邵陽作丁丑爲嘉定十年則彌寧
嘉定十年尙未去邵陽任序當作于此時集中有謝
鄭中卿惠螭蚌詩案中卿名城閩縣人號松窗涪熙
十一年進士慶元中曾隨張貴謨使金箸燕谷剽聞
二卷累官幹辦諸軍糧料院見宋詩紀事福建通志
選舉表則序爲鄭域所作無疑也序之書法與全書
同當以域手書上版者已開林吉人書鈍翁文鈔漁
洋精華錄之先路矣

宋槧劉後村集跋

後村居士集五十卷宋槧本前有淳祐九年林希逸序二十卷後有門人迪功郎新差昭州司法參軍林秀發編次一行每葉二十行每行二十一字語涉宋帝皆空格卷一至十六皆淳祐庚戌臘月以前作卷十七十八詩話卷十九二十詩餘卷二十一以後皆文也

四庫所收卷數與此本同惟

四庫本有賀賈相啟及復相啟再賀平章啟及詩話後集此本無之豈別一本耶後村居士六集一百

九十六卷余家藏有之又有抄本五十卷爲盧抱經舊藏似卽從此本出余初疑五十卷本從大全集選擇及以大全集校對詩凡四十八卷今祇有庚戌以前十六卷詩話分前後續別新五集祇有前集二卷詩餘五卷記六卷序四卷題跋十三卷今各得兩卷啟十一卷今祇得四卷墓志十八卷祇得五卷祭文五卷書七卷行狀五卷今各得三卷表牋四卷祇得一卷而內制外制奏議油幕箋奏神道碑駁狀判狀書易講義進故事各類則不登一字考洪天錫撰後村墓志稱後村早負盛名晚掌書命每一制下人人

傳寫號真舍人達官顯人欲銘先世勳德必託其文以傳江湖士友爲四六及五七言往往祖後村氏于是前後續新四集二百卷流布海內歸然爲一代宗云云是後村集宋時刊行已有前後續別四集二百卷此本當爲四集之一以不收清祐庚戌以後詩証之其爲前集無疑也千頃堂書目載後村居士集五十卷註曰詩文當卽此本又六十卷註曰皆文又詩集十五卷今雖不可見要皆在大全集中矣老妓老將老馬三詩乃清祐庚戌以前作故刊入前集其餘七詩今見大全集二十二卷乃庚戌以後作當在後

集中非有所刪擇也

影抄陳復齋集跋

龍圖陳公復齋先生文集二十三卷附錄一卷前有
洎祐戊申鄭性之序卷一卷二歌賦雜詠古風卷三
四五言卷四五七言卷六奏劄卷七雜說策問卷八
銘贊箴戒卷九記卷十序題跋卷十一至十六書劄
卷十七送序贈序送行詩壽詩挽詩卷十八祭文卷
十九祝文青詞上梁文卷二十勸諭文卷二十一二
十二墓誌銘二十三行狀別以翰墨大全所載仰止
堂規約等爲拾遺附錄則宋史本傳及遺事十一條
仰止堂記黃幹陳洎書劄方大琮與其子書劄門人

劉克莊祭文眞德秀兩跋黃績劄鄭至記蔡沈劉克莊高九萬戴復古詩也案宓字師復以父俊卿任厯知安溪縣入監進奏院擢大府丞知南康軍改劔州廣東提刑直秘閣乞祠事蹟詳宋史本傳是集爲其子圭字表夫者所編各家書目未見箸錄惟福建通志經籍志有之史稱宓嘉定七年封事九年轉對劄子慷慨盡言指陳剴切嘗爲朱墨銘辨理欲分寸之多寡今具載集中所附宋史列傳與今宋史同宋史脫脫所修非宋人所得見當是八元後所增四庫未收阮文達亦未進呈誠罕觀之秘笈也

影宋抄永嘉四靈詩跋

永嘉四靈詩甲乙丙丁四卷汲古閣影寫宋刊本每卷首行題曰永嘉四靈詩旁注甲乙丙丁等字甲乙丙三卷次行題曰徐照道暉旁注上中下等字版心有徐上徐中徐下等字丁卷次行題曰徐幾版中旁注上字版心徐幾上三字各有字數每葉二十行每行十六字直齋書錄解題載徐照△三卷徐幾△二卷與此合惜幾△祇存上卷耳照△存詩二百六十七首較石門顧修羣賢小集本名芳蘭軒△者多詩一百六十二首顧本多莫愁曲三峽吟李夫人何所

歸四首越魚吟後半多十六字蓋影宋本卷下缺第
六葉第十葉祇存十餘字當卽在缺頁之中璣公存
詩一首零兩首其六十四首爲顧刻名二薇齋集者
所無李丹士一首題誤作自覺其七十二首爲影宋
本所無當在下卷之中耳翁卷葦碧軒集有送徐璣
赴龍溪丞因過泉南舊里詩趙師秀清苑齋集有送
璣赴永州椽詩此致中仕履卽宋元詩會之所本也
紙白如玉墨光如漆烏絲精整書法秀美毛斧季所
謂每葉費銀一錢許者此類是也前後有毛子晉父
子藏印十餘方席玉照藏印二方玉照名鑑亦常熟入

山房集跋

山房集二十卷宋周南撰宋史藝文志直齋書錄解題皆著于錄原本久佚乾隆中館臣始从永樂大典錄出編爲山房集八卷後集一卷南雖以駢體擅場頗留心於史事題跋一卷考訂羣書原原本本不在晁公武陳直齋之下雜記一卷足補宋史之缺康與之傳述其貪淫奸惡陷害蘇師德父子諸事歷歷如繪洵足誅奸邪於已死發潛德之幽光余已採入補宋史佞倖傳矣

宋槧指南錄跋

新刊指南錄四卷附一卷前有德祐元年自序景炎
改元後序次目錄每葉十六行每行十六字序中北
兵虜帥呂師孟北虜誤吾國之誤字陷吾民之陷字
罵逆賊之逆賊字及文天祥三字皆挖空詩中挖空
處亦甚多當是景炎中刊本入元後挖去者此則元
時印本也凡重字皆刻又字如日又悠又漫又慘又
之類爲宋刊所罕見卷中有竹塢眞賞朱文方印毛
晉二字朱文連珠印汲古主人朱文方印毛氏子晉
朱文方印蓋經明文文肅毛子晉兩家收藏者

儀顧堂續跋卷十三

歸安陸心源伯剛甫著

元槩吳禮部集跋

吳禮部文集二十卷前有吳先生小像及蘭陰山人自贊卷一賦四言詩卷二至卷五古詩卷六七律詩卷八九絕句卷十雜著卷十一書卷十二三記卷十四五序卷十六至十八題跋卷十九策問卷二十移祭文事迹共九百六十首附錄張樞撰墓表杜本撰墓誌銘每葉三十二行每行二十字

四庫提要云吳禮部集流傳頗渺此本乃新城王士

禎寫自崑山徐秉義家因行于世則元刊之少可知
二十卷後有黃蕘圃手跋中有季振宜藏書朱文方
印

元槧元印清容集跋

清容居士集五十卷目錄二卷後附王瓚所撰謚議
蘇天爵所撰墓志銘每葉二十行每行十六字字皆
趙體與元刊玉海相似當爲同時所刊上海郁氏宜
稼堂刊本之所祖也卷五十後有永樂丙申畏齋王
肄手跋言得此書蟲鼠損傷於暇日補治則中間抄
補皆明初人筆也是書抄帙尙多刊本流傳極罕余
又藏舊抄本爲愛日精廬張月霄舊藏後錄王肄跋
當從此本抄出恐世無第二本矣

宏治本王秋澗全集跋

秋澗先生大全文集一百卷每葉二十四行每行二十
十字明宏治刊本行款與元至治壬戌嘉興路刊本
同當卽以元刊翻雕者惟元刊前有王構序王士熙
王公儀羅應龍跋明刊皆缺元刊制辭哀挽墓志皆
列總目之後目錄之前版心刊目錄二字未免眉目
不清明刊則改列於後版心刊附錄二字較爲允當
耳

元槩歸田類彙跋

張文忠公文集二十八卷附錄一卷前有字尤魯翀
歸田類稿序次目錄卷一賦卷二擬雅卷三至卷五
古詩卷六至卷九律詩卷十絕句卷十一書卷十二
十三序卷十四至十六記卷十七至二十碑銘卷二
十一表銘碣銘壙銘卷二十二誌銘卷二十三表傳
書疏露布操卷二十四文詞贊卷二十五至二十七
三事忠告卷二十八經筵餘旨附錄則畫像倪中撰
記劉耳撰贊張起巖撰神道碑黃潛撰祠堂碑也每
葉二十行每行十八字版心有字數元元統刊本

四庫所收以明刻二十七卷本爲本而別採永樂大典所載補其遺缺釐爲二十四卷似當時未見元刻此本據字尤魯舛序書爲養浩所自編與十三卷所載自序九百餘首四十卷之數不合愚謂自序是初退休時作當在至治中此或天曆以後所定有所棄取耳卷中有周春二字白文方印松藹二字朱文方印松藹藏書朱文方印海甯周范兮舊藏也

元槧松鄉集跋

松鄉先生文集十卷次行題句章任士林叔實前有趙子昂撰任叔實墓誌銘陸文圭敘杜本敘卷十末摹刊任勉私印陽文方印任氏近思陰文方印辟口世家陰文方印每葉二十六行每行二十三字是書有明泰昌時刊本脫誤甚多此則其祖本也卷中有蓮涇朱文方印太原叔子藏書記白文長印金星輅藏書記朱文長印任勉或卽刊書之人俟攷王聞遠號蓮涇吳縣人編有孝慈堂書目金星輅嘉興人編有文瑞樓書目皆乾嘉間藏書家也

元槧檜亭集跋

檜亭藁九卷次行題天台丁復仲容父前有至元五年李桓序六年李孝先序四年危素序十年楊嗣序後有十年論立跋每葉二十行每行二十字每篇下注明前集續集前集其婿饒介編續集門人李謹之編此則至正十年南臺御史張惟遠合刻于集慶學宮者有閩中徐惟起藏書印朱文長印徐興公白文方印晉安徐興公家藏書朱文方長印及薩守德相兩印面籤亦興公手書也

元槧松雪齋集跋

松雪齋文集十卷目錄一卷外集一卷附楊載撰行狀至順三年謚文一卷前有戴表元敘下有戴氏率初陽文方印後有至元後己卯何貞立跋下有長沙何貞立陽文長印卷十後有花溪沈璜伯玉跋行狀後有黃蕘圃手跋集爲趙仲穆所編文敏歿後二十一年尙未付梓至元後己卯沈璜始從仲穆假本刻于家塾案花溪在今歸安縣治東六十里璜蓋歸安人當與沈夢麟一家與趙氏有連獨怪是集卷帙無多仲穆不自梓行必待璜爲之刊不可解也

元槧趙子昂詩集跋

趙子昂詩集七卷題宜黃後學譚伯潤伯玉編集前有目錄目後有至元辛巳春和建安虞氏務本堂編刊一行每葉二十二行每行二十一字元麻沙書坊刊本卷一五古卷二五律卷三五絕卷四七古卷五七律卷六七絕卷七六言雜箬比松雪齋集多有所思望美人等詩十餘首

洪武本九靈山房集跋

九靈山房集二十卷題男戴禮叔儀類編從孫同伯初伯編前有至正二十五年揭泂序洪武十二年翰林待制宋濂序王禕序皆以手書上版者濂序下有景濂朱文連珠印金華宋太史氏朱文方印龍門生朱文方印每葉二十八行每行二十字卷中有徐燠之印朱文方印徐氏興公白文方印孔御家藏白文方印鄭氏注韓居朱文長印鄭燕之印白文方印閩中徐惟起藏書印朱文長印余又有一部後缺六卷曹倦圃抄補有曹溶之印朱文方印

元槧陳眾仲集跋

陳眾仲文集十三卷卷五題安雅堂集前有至正九年張翥序至正辛卯晉安林泉生序每葉二十行每行二十字語涉元帝皆提行元刊本卷一至三賦詩卷四至六序卷七至十記卷十一十二碑銘卷十三銘跋解說策問贊傳各體皆備並無缺少

提要以元史本傳四字爲三字之譌良是前有黃蕘圃手跋卷末有虞稷二字白文方印前有士禮居白文長印二酉藏書白文方印蓋經黃虞稷千頃堂黃蕘圃百宋一廬收藏者

洪武本程雪樓集跋

楚國文憲公雪樓程先生文集三十卷附錄一卷次
行題奉直大夫秘書監著作郎男大本輯錄二行翰
林侍講學士中奉大夫知制誥同修國史同知經筵
事門生揭傒斯校正卷一至卷九玉堂類藁卷十奏
議存稿卷十一至二十五記序引碑銘贊說箴祭文
祝文書啟題跋二十六至三十詩而以樂府殿焉前
有歐陽玄序下有太史氏陽文長印區易玄印陽文
方印文忠世家白文方印次李好文序序後有至正
癸卯中春雪樓諸孫世京謹錄刊行一行次江陵熊

釗序附錄則行狀神道碑晉錫堂記像贊詩詞書後
祭文也是集揭奚斯原編四十五卷其孫世京與揭
泫重定爲三十卷至正二十三年刊于建陽劉氏書
肆成十卷而元亡肆毀世京之子程涪程湑命書市
朱白達續成至洪武廿六年刻全熊釗爲之序此其
初印本也有休寧汪季青家藏書籍朱文方印古香
樓朱文腰圓印汪文柏白文方印柯庭圖書朱文方
印柯庭流覽所及朱文方印松藹藏書朱文方印餘
印不錄

明景泰本道園學古錄跋

道園學古錄五十卷次行題雍虞集伯生首有靳陽
鄭法序次摹刻歐陽元手書序歐陽致劉伯溫書及葉
盛跋次日錄目錄後有重增目錄其文則散入各卷
之內一至二十日在朝藁二十一至二十六日應制
錄二十七至四十四日歸田藁四十五至五十日方
外藁爲道園之幼子翁歸及其門人李本所編後有
李本跋至正元年閩憲僉幹克莊刻于福建至正九
年江西肅政廉訪使劉伯溫改爲大字重刊之大字
版不久卽亡景泰七年鄭達知崑山過太倉之興福

寺得建本于寺僧陳與主簿南海黃仕達捐貲刻于東禪寺四閱月而畢工建本無序歐陽元序及致伯溫書則成化中葉盛從道園四世孫吳江虞湜家就大字本鈎摸補刊者也每葉二十六行每行二十三字版心或刊道園學古錄幾或刊學古幾學多作孛錄多作录當卽以建本翻刊者明嘉靖覆景泰本行款匡格皆同惟重增目改入各卷之內吳兔牀所藏本爲人割去葉盛跋歐陽札鄭達序題跋記遂誤以爲元刊不知鐫刻有歐序者乃大字本也莫友芝經眼錄誤同不免爲書賈所愚矣

元槧道園遺稿跋

道園遺稿六卷次行題雍虞集伯生前有至正己亥楊椿序募刊眉山楊椿朱文方印楊子壽章白文方印後有至正二十年黃潛序募刊金華二字朱文長印黃氏晉卿白文方印每葉三十二行每行二十二字至元二十四年吳江金天瑞伯祥刊本後附鳴鶴餘音一卷爲伯生與全真馮道士唱和之作馮先有蘇武慢詞二十首伯生和十二首無俗念一首後有伯生記及至正甲辰金天瑞跋每葉二十行每行十七字

元槧翰林珠玉跋

新編翰林珠玉六卷次行題儒學學正孫存吾如山家塾刊三行題邵菴虞集伯生父全集前有目錄每葉二十二行每行二十字共計詩五百八十八首七律次韵宋顯甫一首與前御溝詩複其出于道園學古錄之外者四言古一首五言古三首七古三首七言律廿二首七言絕廿八首存吾廬陵人元風雅亦其所選也觀是書款式所選似不止一家今祇存伯生一家耳有黃丕烈印白文方印復翁白文方印白堤錢聽默經眼朱文長印後有堯圃兩跋

李雲陽集跋

雲陽集十卷明弘治刊本前有危素序後有弘治王子傅瀚跋潘辰題弘治癸丑李東陽跋以

文淵閣傳抄本校一過閣本卷六雲笈記後脫永靈權茶鹽提舉事進思堂記一首凡五百九十一字卷二和汪士章詠一鏡亭韻原本二首閣本亦脫一首凡二十字危素序閣本亦缺

卞山小隱吟錄跋

卞山小隱吟錄二卷元黃玠撰玠爲黃東發先生曾孫父名正孫字長孺自號尙綱翁其沒也黃潛爲誌其墓見金華黃先生集此本上卷五言古下卷七言古而無近體詩似不屑爲近體詩者然玠嘗與顧玉山瑛游玉山名勝集載玠七律十餘首吳興藝文補載玠七律四首五律一首七絕六首均在此本之外似非不爲近體詩者想大典所存祇得其半非全帙也

元藁間居叢稿跋

順齋先生間居叢稿二十六卷次行題曰男蒲機類編門生薛懿校正前摹至正十年前史官金華黃潛手書序下有金華二字陽文連珠印黃氏晉卿白文方印後附其弟道銓誄及墓石文每葉十八行每行十四字字畫娟秀體兼歐褚必是名手書以上版者卷一卷二賦及古詩卷三五律卷四至六七律卷七八絕句卷九銘箴贊解辨說樂語春帖疏卷十題跋卷十一齋醮文祝詞致語上梁文詩聯卷十二樂府卷十三經旨策卷十四傳記卷十五制表牋卷十六

碑卷十七書卷十八至二十序卷二十一 字說序卷
二十二祝文卷二十三祭文表辭卷二十四五墓誌
銘墓表卷二十六行實案道源二子樞早世機中戊
午第仕文水縣尹西大行臺辟爲掾見墓石文

元槧牧潛集跋

筠溪牧潛集一卷次行題高安釋圓至前有大德三年方回序以手書上版下有西齋陽文長印方萬里父陽文方印虛谷書院陽文方印後有大德三年天目雲松子洪喬祖跋其書不分卷以類各爲起訖詩一銘二碑記三序四書五雜箸六榜疏七故喬祖跋祇云一卷也每葉二十四行每行二十一字元大德刊本至明刻始分爲七卷

四庫本卽以明刻箸錄此則元刻祖本也前後有錢天樹印白文方印曾藏錢夢廬家朱文長印

元槩丁鶴年集跋

丁鶴年詩集三卷次行題門人四明戴稷戴習修江
向誠向信道方外曇錚編次前有至正甲申戴良序
下有叔能陽文方印澹居老人至仁序下有至仁陽
文方印兆中陰文方印後有烏斯道丁孝子傳缺名
高士傳後有徐惟起手跋前有晉安高氏惟式朱文
方印閩中徐惟起藏書印朱文長印徐渤之印白文
方印徐氏興公朱文方印高惟一明初福州人有孝
行福建通志有傳則是本在明初已爲藏書家所珍
矣

元槩鐵崖古樂府復古詩集跋

鐵崖先生古樂府十卷復古詩集六卷題門生富春
吳復類編前有至正丙戌張天雨序吳復序卷十後
附鐵崖所作吳復墓誌至正八年復卒其後人所附
八也詩集題太史紹興楊維禎廉夫箸太史金華黃
潛卿評門生雲間章琬孟文註前有至正二十四年
章琬序後有至正甲辰琬跋下有印曰學古曰雲間
世家曰章氏孟文其目錄以復古詩集連作十六卷
詩則別爲起訖版心統題古樂府復序云先生爲古
雜詩五百餘首自謂樂府遺聲琬序則云輯前後所

製二百首及吳復所編又三百首名曰復古詩集蓋其體爲古樂府復古則琬所名也故琬所註者名復古詩集其不註者仍名古樂府蓋二而一者也今復所編四百九首琬所註一百五十二首共得五百六十餘首分計之則篇數不符總計之固有贏無絀無所刪削也吳復字見心富陽人四歲能誦書千餘言喜吟哦學詩于鐵崖自號雲槎秋客著有雲槎集以處士終

叢書堂本貞一稟跋

貞一齋雜著一卷詩稿一卷次行題臨川朱思本本
初父前有至治三年臨江范梈序眉山劉有慶序泰
定二年虞集序四年吳全節序天歷元年柳貫序卷
末有時壬申中秋前四日五鹽道生姚楫敬書版心
有叢書堂三字精抄本字體似吳匏菴案叢書堂爲
匏菴藏書之所姚楫當是匏菴門下而爲之抄書者
故字亦似之阮文達以爲匏菴手抄者非也

四庫未收阮文達始進呈思本事蹟詳掣經室外集
有黃丕烈印蕘圃平江黃氏圖書朱文方印三

鐵崖文集跋

鐵崖先生文集五卷次行題會稽楊維禎三行題毘陵朱昱校正前有宏治十四年馮允中引後有朱昱跋其爲東維子集所未收者序三首題識三首傳二首錄一首議記四首跋八首書四首辨一首志五首贊五首箴一首說十六首銘一首祭文二首墓誌銘四首

四庫未收阮文達亦未進呈卷中有朱象元氏朱文方印太史氏印白文方印雲間世家朱文方印謝庸印白文方印東墅朱文方印

元張伯顏槧本文選跋

文選六十卷次行題曰梁昭明太子選三行題曰唐
文林郎守太子右內率府錄事參軍事崇賢館直學
士李善注上前有李善序進書表呂延祚進書表元
宗詔旨元余璉序元槧本每頁二十行每行大字二
十注雙行行二十一字每卷有目連屬篇目版心間
有刻工姓名卷一首葉有九華吳清床刀筆七字六
十卷末有監造路吏劉晉英郡人葉誠一行行款與
宋尤延之刊本同其與尤本不同者每卷首葉之第
四行有奉政大夫同知池州府路總管府事張伯顏

助率重刊廿一字卷一之第一葉則以尤本第十行
班孟堅下小注六行排密縮爲四行卷二則以張平
子下小注八行縮爲六行卷三則以第六行張平子
薛綜注六字移于第五行東京賦下卷四則以第四
行京都賦中三字并入第五行卷五則削第五行左
太沖吳都賦一首劉淵林注十二字而移左太沖劉
淵林注七字于第六行吳都賦下卷六則以第五行
魏都賦一首及小注并入第六行卷七則以第七行
攷獵下二字并入第八行卷八則以第五行司馬長
卿上林賦并入第六行卷九則以第八行班叔皮北

征賦一首八字并入第九行卷十則以第四行紀行
下三字并入第五行卷十一則以第九行王文考魯
靈光殿賦十字并入第十行卷十二則以第五行木
元虛海賦五字并入第六行卷十三則以第十二十
三行風賦小注四行縮爲兩行卷十四則以第五行
顏延年赭白馬賦并入第六行卷十五則以第四行
志中二字并入第五行卷十六則以第九行陸士衡
歎逝賦六字并入第十行卷十七則移第十行陸士
衡三字于十一行小注上卷十八則以第八行長笛
賦小注四行縮作兩行卷十九則以第六行第七行

并作一行卷二十則以第五行曹子建上責躬詩十
三字并入第六行應詔詩之上卷二十一則以第九
行鮑明遠詠史詩一首八字并于第十行卷二十二
則以第二葉第九行宿東園詩一首六字并入第十
行卷二十三則以第十九行并入第二十行卷二十
四則以第十七行并入第十八行卷二十五則以第
十七行酬從弟惠連五字并入第十六行卷二十六
則以第二葉第七行并入第八行卷二十七則以第
二葉十一十二三行縮爲兩行卷二十八則以第
十二行劉越石屏風歌一首八字并入十三行卷二

十九則以古詩十九首小注六行縮爲四行卷三十則以第八行擣衣詩五字并入第九行卷三十一則以孫巖宋書云云小注四行縮爲兩行卷三十二則以序曰云云小注六行縮爲四行卷三十三則以第六七八三行并作兩行卷三十四則以漢書曰枚叔云云小注四行縮爲兩行卷三十五則削第十行七下二字卷三十六則以蕭子顯齊書云云小注八行縮爲六行卷三十七則以表者明也云云小注十行縮爲八行卷三十八則以第十五十六兩行縮作一行卷三十九則削第十三行上書二字卷四十則以

第十一行并入第十二行卷四十一則以第七行并
入第八行卷四十二則以十七十八兩行并作一行
卷四十三則以第十行十字并入十一行卷四十四
則以第八行八字并入第九行卷四十五則以第十
四行八字并入第十五行卷四十六則以第六行十
三字并入第七行卷四十七則以第十一行十一字
并入十二行卷四十八則以第六行九字并入第七
行卷四十九則以第七行六字并入第八行卷五十
則以第十一行六字并入第十二行卷五十一則以
第四行七字并入第五行卷五十二則以第六行王

命論三字移入第七行善曰王命者云云之下而移
班叔皮三字于第九行雙行注之下卷五十三則以
第七八九三行縮作兩行卷五十四則以五等公侯
云云小注四行縮作兩行而削陸士衡三字卷五十
五則以第九十一三行小注縮作兩行卷五十六
則以十四行九字并入十五行卷五十七則以第十
行九字并入第八行卷五十八則以第九行九字并
入第十行卷五十九則以姓氏英賢錄小注六行縮
爲四行卷六十則以第七行八字并入第八行其行
款起訖皆與尤延之本同惟尤本兩都賦序注亦皆

依違尊者都舉朝廷以言之六臣本都上有所字舉
上有連字此本有此二字與尤本不同似是既刻成
而挖改者當是伯顏據六臣本所改以掩其襲取尤
本之迹耳池州爲昭明封國有昭明廟廟有文選閣
文簡始刻善注置版學宮見清熙辛丑文簡序元初
燬于火大德中司憲伯都嘗新之延祐中復燬伯顏
重刻之見余璉序獨怪清熙距大德不過百餘年版
雖燬印本必非難得伯顏不以原刻重雕而必改寫
重刻既改寫重刻矣又惟恐失尤本之真于每卷首
葉縮小排密以就之何也宋人刻書皆于卷末列校

刊銜名從無與著書人並列者隆萬以後刻本此風
乃甚行伯顏其作俑者也伯顏原名世昌文宗賜名
伯顏蘇州相城人至順中知福寧州置田造士人多
稱之見僑吳集及福建通志尤本無呂延祚序及元
宗詔伯顏據五臣本增之不免畫蛇添足余璉序文
理澁謬殆學姚牧菴而失之不及者歟元之路宋之
州軍明之府卷末路吏二字亦元刻之一證也

宋蜀大字本三蘇文粹跋

三蘇先生文粹七十卷卷一至卷十一老泉先生文
卷十二至四十三東坡先生文卷四十四至七十穎
濱先生文每葉二十行每行十八字版心有刊工姓
名語涉宋帝皆空格宋諱避至柜構止蓋紹興初蜀
中刊本也有李申者兆洛手跋季振宜藏書朱文長
印張金吾印白文方印月霄白文長印卽延陵季氏
宋版書目愛日精廬藏書志所著錄者

影宋抄尤本文選考異跋

李善與五臣同異四十一葉影寫宋刊本行款與尤
本文選同有摹尤延之手書刻文選題及淳熙辛丑
袁說友跋又說友刻昭明太子集跋不著撰人姓氏
袁跋有尤公博極羣書親爲校讎語則此四十一葉
亦必文簡所爲無疑也宋人朴實不以校讎一二字
自矜獨得故自序不言第二十葉有云自齊謳行至
塘上行五臣與善本倫次不同是文簡所據必有善
注單行本非從六臣本摘出至尤序所云衢州本余
家有其書四明本亦尙有存者皆六臣注非單行善

注由是觀之善注單行文簡以前無刻本矣袁刻文
選跋胡氏克家據陸敕先校本錄于考異後脫學者
是所謂成民而致力于神者與淳熙辛丑三月望日
建袁說友題二十七字昭明集五卷余藏嘉靖乙卯
覆宋本袁跋在焉葉調生吹網錄謂今無傳者誤也
池州昭明廟疾疫水旱有禱輒應淳熙中江東旱說
友與池人禱之應見文簡題東堂跋中昭明生不與
侯景之難沒而血食池州千餘年不衰天之報施文
人可謂厚矣

成化唐藩本文選跋

文選六十卷明成化丁未唐藩刻本前有唐藩希古序後有唐世子跋每卷李善銜名後有張伯顏重刊銜名兩行每葉二十行每行二十二字注雙行文義悉依延祐中張伯顏池州刊本而字畫較精惟唐藩序不言所本世子跋則若唐藩自以五臣注刪存善注者豈唐藩父子于此書均未寓目耶每卷有伯顏名而序若佯爲不知者豈刻成後亦未寓目耶不可解矣伯顏重雕尤本不言所本亦不仿宋人列名卷末之列而自列銜名于作者之次好名而近于陋唐

藩所雕張本亦不言所本幾若善注單行自我作古
可謂心心相印然既已沒其由來矣而仍刻其名且
改易行款非以原本重雕助率重刊四字其義又安
在乎惟張刻仍尤本之舊此刻又仍張刻之舊在文
選諸刻中不失爲善本耳